

青神縣志卷四十七

僭竊志

宋

淳化四年正月青神民主小波李順聚眾爲亂初蜀亡其府庫之積悉輸汴京後任事者競趨功利於常賦外更置博買務禁商賈不得私市蜀地狹民稠耕稼不足以給由是小民貧困小波因謂眾曰吾疾貧富不均今爲汝均之貧者爭附遂攻青神掠彭山殺縣令剖其腹實之以錢惡其誅求無厭也旁邑響應西川都巡檢使張玘與戰於江原江射殺小波而

青神縣志

卷四十七僭竊

卅

玘亦死之其黨推小波妻弟李順爲主眾至數十萬攻陷綿漢彭邛進攻成都陷之五年正月命宦者王繼恩爲兩川招討使雷有終爲轉運使討之王果率兵趨劍門尹元率兵由峽路而進二月順分眾數萬寇劍州劍門都監上官正有疲卒數百激以忠義力戰以守會成都監軍宿翰兵至正與之合迎擊賊眾大破之斬馘幾盡餘三百人奔歸成都順怒其驚眾盡斬之時朝廷深以棧道爲憂於是閣道無壅王師得以長驅西進順又攻施州亦爲利兵所敗三月詔凡被脅從能歸順者並釋其罪四月王師由北劍門路入研石寨破其

眾斬首五百級追至綿州順兵望風奔走殺戮及溺死者不可勝計又遣曹習破賊於老溪進復閬巴蓬劍等州五月破賊十萬眾斬首三萬級獲李順復成都生擒僞樞密使并甲鎧僞服用甚眾其黨復攻陷嘉戎等八州繼恩等頓師不進專務飲博其下恣橫剽掠餘勢復張八月張咏知益州遣正翰楊瓊衛紹欽等分出且舉酒囑軍校曰爾等荷國厚恩此行當平蕩醜類若老師曠日此地還爲爾死所矣由是正等決行深入大致克捷時民多脅從咏諭以恩信使各歸田里明年正月帝下詔罪已曰朕委任非當燭理不明致親民之官不以惠和爲政管權之吏惟用刻削爲功撓我蒸民起爲狂寇念茲失德是務責功永鑒前非庶無貳過聞者咸悅二月餘攻眉州翰擊敗獲之餘黨悉平

順治元年八月初九日流賊張獻忠陷成都分陷各州縣十月賊將狄三品陷眉州二年七月賊將劉文秀陷丹稜踞其署驅城中民於西門外濟橋殺之屍與橋平又遣兵搜山以繩絡男婦擁至江陵廟殲焉剗北山爲教場操兵三月而去時邑人彭萬崑謀拒賊爲持牛酒偵賊營聚勇壯守險阨賊入鄉輒殺之有打糧賊三百突至設伏誅於三溪口賊不敢

進一鄉獲全三年正月初五日屠眉州先期狄三品傳令除城盡勦民不悟以爲入城可免老幼盡避城中是日驅城中人集道姑巷田壩上悉屠之州民陳登皞混名鐵脚板憤賊殘酷裂衣爲旗招集四鄉遺民得數千樹棚醴泉河上賊攻之登皞率眾白梃鋤殺賊三百賊懼從間道潛移東館登皞復遣壯士持酒米雞豚迎於道賊納之營中夜半襲營壯士從中鼓噪殺出賊大駭競奔復斬首數百賊遁去登皞自以鐵勝名營遠近悉歸之二年中無一騎犯境者後嘉定向成功率眾欲節轄登皞登皞不從成功圍之登皞力戰死成

功遂踞其地三月明叅將楊展恢復嘉定獻忠遣劉文秀狄三品來攻敗去展盡復眉邛雅諸州邑獻賊殺川民已盡率兵十數萬裝金寶數千艘順流東下欲乘勢走楚楊展逆於彭山之江口縱火大戰燒沉其舟賊奔北士卒輜重喪亡幾盡復還成都展取所遺金寶以益軍儲自是富甲諸將獻賊走川北展追賊於漢州不及而還冬十二月

王師誅獻賊於鳳皇山五年故賊將袁韜武大定歸楊展展愛其材武厚待之令韜屯犍爲大定屯青神六年袁武刺殺楊展初明故巡撫李乾德怨展遇已疎畧陰勸袁武圖展會袁

壽置酒犍爲邀展展醉刺殺遂圍嘉定三月城陷展子璟新
出奔袁武悉并其資與衆獻賊誅後賊將孫可望劉文秀等
竄入雲南聞展死使王自竒伺川南劉文秀白文選等取遵
義於是全川復陷於賊八年文秀攻嘉定袁武敗降於賊九
年

大兵至眉州向成功據守石佛棧大兵攻破其柵成功中流矢
死三月南征下嘉定十年大破劉文秀等於保寧繼下重慶
叙州馬湖等屬康熙元年壬寅冬十二月總督李國英統秦
豫廣三省會四川進勦餘孽俱盡全蜀收入版圖招來安集

青神縣志

卷四十七 寇警

四三

始獲享昇平之福矣

咸豐九年九月初滇匪李永和等起於滇蜀交界之老鴉灘
其時僅三四十人不數日遂至累百累千直走筠連慶符以
逼叙城我青邑實爲上游小縣一時文武員弁與軍務者必
由縣經過亦已不勝其煩擾矣且來往文書絡繹不絕縣主
文曾於縣屬之關子門瑞峯場黑龍場等處派撥兵書各一
名以爲書號投遞之任城中募勇數百名藉資捍禦蓋亦奉
憲札遵行者也是年之冬逆首藍大順忽然上竄突至犍樂連
界之五通廠我青邑相距百餘里耳承平日久民不知兵不

惟我邑人民相顧失色卽上游一帶州縣莫不震恐張皇束手無策維時卽有無業游民乘機搶劫名爲土匪處處皆然不獨我青邑也縣主文立將劫奪楊基之余歪老五等六人訊明梟示於是土匪之風頓息文主每言賊來必由虎渡溪疊請大兵防守不至思欲控斷其路未果迨十年三月初七日藍逆果由虎渡溪來文主以數日前巡防乘馬墜跌之軀力疾帶勇堵禦並州憲所委吏目代辦青神之黃志學同到虎渡溪西岸助勦且有陳愷人炮船及州憲撥來勇丁二百名亦併力轟擊自寅至未賊不能渡遂沿上游觀音灘淺處

青神縣志

卷四十七 寇警

四三

過河縱火焚燒狼烟乍起團勇遂紛紛潰散城內有傅協戎帶領官兵數百於前一日到縣官民皆恃以無虞乃一聞賊至卽遁不知何以畏賊如虎也傍晚城陷縣治自雍正七年復設因前廢城改修門洞原無垛口坍塌已甚歷百餘年未修間有補砌亦旋補旋崩不復可守自是賊至擄掠焚毀十不存一學署廳署汛署考棚武廟全燬惟縣署尙存大堂文廟文昌宮火神廟及各廟均有損傷幸僅一晝夜卽上竄眉州城中雖被蹂躪而四鄉尙屬安全此賊至初次之情形也是年八月藍逆復由丹稜回竄邑圍堵於鴻化堰二十二日午

初賊至各團鎗炮齊施戰至申刻賊衆大至多寡不敵團勇始退二十三日藍逆沿江順流下縣亦踞縣城縣主蔡率伊家室及書差並監內人犯等遁於四十里外之三峽口賊越兩晝夜始於二十五日由西門竄入夾江十一月李逆復令其黨李玉齋竄擾縣東之羅家灣河壩子等場二十二日署縣德督團會合楚勇與賊戰於河壩場全股撲滅首逆就擒縣屬之民當賊路者雖亦扶老携幼畧受擾害而他處未被賊戕亦病之未甚也此賊至二次之情形也十一年三月逆首李永和自率全股由牛腹渡來適提憲蔣玉龍統大兵先

到邑人願爲備柴草糧食泣懇留城以資捍衛殊蔣提憲陽許陰違竟於次日二十一黎明盡行撤去父老有哀留者伊皆託言尚有白翼長兵萬人將到在此住紮民受其愚猶未知爲誑詞也無何大兵甫去大逆突來卽用兵船渡江攔入縣城聞兵有後行者皆被戕害踞城後李逆不佳青神直攻眉州大股遂紮眉之西南路紮青神者係伊滇人周長春綽號周濫腦壳其營曰北井營周逆之下尚有僞統領四人東曰宋南曰蔡西曰文北曰王其餘僞巡捕及僞千總把總不可勝計將我邑境界肆掠無遺旬餘始出示安民欲爲久遠

之計民苦無奈苟可以暫保身家姑順其意以待大兵之至耳自三月迄八月秋收將備賊出城挨戶打糧踰於縣界民不敢拒城鄉內外樹木斫伐殆盡周逆儼然自以爲青神之主春秋必於各廟祭祀以城內爲禁地令百姓於城外集市亦照常買賣未知意欲何爲也十月官軍到眉連日進勦賊聚大潰誅戮甚多十二日李逆收合餘燼下奔青神官兵隨後趕追總兵唐友耕陳祥興紮鴻化堰山頂上六日卯逆由青神出隊攻唐陳兩營營棚爲賊焚者十餘處唐友耕與卯逆交鋒彼此互傷唐幾不支幸我邑蓮花場一帶團練接殺追

青神縣志

卷四十七 寇警

四十五

勦愈出愈多卯逆不知虛實收隊遁走被我團勇殺斃者數十人生擒者數十人其時署縣曾主任河東唐氏宅逐日督團進勦困勞成疾未及兩月卒於防所州憲委前任蒲江縣楊代理縣篆仍督飭團民於江之東岸紮堵前署青神縣德亦奉州紮帶領眉青團練由太平場一路相機助勦而楚勇朱桂秋侯光裕彭泰和三營紮壘家壩音勝軍黎得勝紮梁家山其江岸皆係我邑及眉井仁團練總計不下數萬人近城之東門鹽關上游河壩係陳祥興營壘門外距城里許則唐友耕營在焉其餘繞城紮營者皆蔣軍門所帶兵也而唐

友耕陳祥興兩營紮不多時卽奉駱文忠公札調撤去我邑
汎官范興榮原在縣西南北三路調派團練安排作爲接應
之師而南路距城二十里之瑞峯場本係賊匪逃竄之路蔣
軍門令吳嘉春在彼住紮以防賊逸又於城外周圍鑿壕傍
壕紮營賊用木櫃竹筴實以土石依城爲壘連攻不下十二
月十九日夜李逆率大股由南門直冲官軍營盤長驅以去
至瑞峯場去圍吳嘉春營不使出兵截殺以阻去路嘉春被
圍正急幸楚軍朱桂秋等聞警往救我邑南路團練協力堵
勦以戰不踰時殺賊至數千名之多李逆爲之喪胆潛竄漢

陽場思欲下游逸去聞路險難過遂暫住場內令賊於各鄉
搜掠越兩晝夜復由新路口關子門竄去駱公扎遣楚軍跟
追不令川兵追擊者以城內尙有周逆北井營及周裁縫之
老前營盤踞也二十八日王主於圍防接印日辦堵勦事宜
他務不暇計也川兵合圍久攻無効同治元年三月初李逆
自鐵山派賊數千來我邑河東接援紮營石羔岩蓋恐城內
之賊不能出也無何鐵山之賊甫來城內之賊恃東岸有援
賊於初六夜潛出燒營川兵撤圍楚軍蕭應高黎得勝朱桂
秋唐鳳輝蕭德經亦於是日追到東岸初七日黎明楚軍分

三路進勦賊不能支大敗潰逃鎗傷刀砍墮岩死者不下數千敗賊奔至水打林河岸楚軍三面蹙之撲河死者不計其數浮江到城者不過數十城內之賊喪胆不敢留踞卽率賊東渡緣石羔岩西南北皆懸岩高數十丈下臨小溪長江惟東南接山乃絕地也官兵從東路進故一敗難逃此三次賊至之情形也青邑彈丸小縣著名瘠土被賊竄擾三次盤踞一年城內街房存者寥寥近城二十里焦土一片縣屬民房燒折殆半數年內國防軍米財力俱竭川中受害未有甚於青邑者也幸收復後王主設法賑恤請免兩載丁糧令百姓歸耕復業勉濟時艱惟經費無出一切均未復原爲可概矣

